

高里山神祠記徐世隆撰 徐汝嘉正
至元二十一年十月

重修東嶽高里山神祠記 翰林集賢學士正議大夫知
一制誥同修國史徐世隆撰 承務郎同知泰安州事徐汝
嘉書丹 濟寧路儒學教授揚桓篆額

蒿里者古之挽章之名出於田橫門人感而成歌漢李延
年分爲二曲薤露送王公貴人蒿里送士大夫庶人後代
以爲人死精魂歸於蒿里其山有神主之因立七十五司
以爲追逮收捕出入死生之所也故張華博物志陸機泰
山序皆云人死其魂拘於蒿里白樂天詩曰東嶽前後魂
北邙新舊骨樊殿直修廟記亦言人生受命於蒿里其卒
歸於社首今東嶽山有地府府各有官官各有局皆所以
追死注生冥冥之中豈無所宰而然耶其祠距泰嶽廟之
西南五里許建於社首壇之左自唐至宋香火不絕望之
者入則肅然近則威然出則怖然若有追之者豈非世人

如見真鬼神而然歟吳道子畫地獄變相後成都人來觀
咸懼罪修福田兩市屠沽魚肉不集況此祠司局之多鬼
神之衆固固之深幽其不寒心而駭目者鮮矣金季兵烽
四起玉焚石燼向之所謂像教者又墮之劫灰矣行臺嚴
武惠公治東平民懷吏畏政如神明特敬天倪子提點道
教張志偉張初名志偉後遭遇上知賜名曰志純議起廟
像如初未先而公薨嗣相能爵天倪子鳩工者又數年旣
申省部始許修理聖上卽位懷柔百神無文咸秩詔海內
名山大川嶽瀆諸祠聽所在修完遊會元門掌教宗師管
領諸路道教洞明真人祁志誠與天倪子意契遂竭力以
成舊祠百二十楹近已完繕次第落成其塑像輝耀比舊
有加焉余待罪翰林方作泰山廟碑未竟天倪子曰岱宗
碑成此特碑之一事耳若不足勞執事執事文如流出第
令門生執筆代書則足矣余謂蒿里者社首之禪趾猶在
亦唐代受釐之地使老夫不腆之文得挂名其上固所願
也非所敢望也故附語而爲之記若夫無懷氏封禪之君
有虞氏巡守之代略而不書尊泰山也

宣授中虛至德通元大師東嶽提點監修官兼東平路道
教都提點張志純同建 太師國王嗣孫太中大夫東平
路達魯花赤兼本路諸軍奧魯總管土卜申立石

大元至元二十一年歲次甲申十月乙巳朔十五日己未
岱麓高又元刊